

EM240.107  
41.43  
部 203

# 德清縣新誌

羅迪先  
署簽



德清縣新志卷七

治行志 名守 賢令 良佐（師賓）



凡涖是土以治民者既志職官矣胡又志治行乎蓋以紀吾民之去思也官治聽於民豐碑載諸口若乃壹意承於上而詭於下者毋取焉故他日之選舉罷免且以民意為依歸也前志列治行者有人矣而亦不無佚漏今依例闕者補之繼者續之至其人現存者自有輿誦可憑無俟贅墨前書論之詳矣故不復及

勞鉞字廷器江西德化人景泰五年進士成化八年以太僕寺丞知湖州勤慎耿介政多愷悌王志始至見府學頽圯銳意修建逾年就事商格湖州儒學重修記又建城隍廟工程浩繁而財力不匱王志為人正直不可干以私會有賊黨數百恣睢震澤間前守長至皆厚遺之不為禁鉞至賊黨亦如前卻勿受竟其黨悉捕之斃於獄當時多憚其廉明陸稷勞公神廟碑政務之餘慨然於郡志未修亟命郡士張淵

德清縣新志

卷七 治行

增所未備

彭華湖州府志序 舊志云聘司訓陳頤纂輯郡志此說殊誤 陳頤景泰間人曾輯郡志勞以陳頤為本而增廣之序文甚明

然尤恐見聞不

廣復與諸文學士詳加訂正成書

勞鉞自序

成化十二年六月十三日忽沐浴升堂

與士大夫訣別無疾而逝

王樞廬陵人天順三年由賢良方正為德清教諭嚴條約以率士類九載若一日時諸生多夜誦者樞令一齋僕炬而導行為稽其章程析其經旨並勞以茗果之物三五日輒一行焉士感而奮興多有成者秩滿陞國子監助教教志

陶廉字敬甫

續侯志

雲南曲靖人嘉靖八年進士同年知德清縣邑民尚華茂實

則窘削廉欲改飭之曰風之侈也其端自上始上下兢侈加之要衝因之蝗旱其何以支即日圍者約馬饗者損膳兼以淬勵僚寀期月而民風變傳舟經雷甸河日以數十廉為供具徒隸但令不失賓客意享禮不務繁腆以悅直事者稱不擾善窮兩辭決問不宿豪狡潛格歲稔善貸移歲課預足而催科隸不行於鄉審葺編戶條貫密緻百年隱匿一朝剔盡版籍獻內府者德清稱最

張胡志

志

高倬續侯志崇禎四年由金華任徵授御史上疏請撤總監鄧希詔以安蘄遼總

督曹文衡不納貶一秩十一年五月倬以近者刑獄滋繁法官務停閣請敕諸

司尅期奏報大者旬小者五日其奉旨覆讞者或五日三日務俾積案盡疏罔

固衰減上為採納遷南京太僕卿十六年擢右僉都御史提督操江秋召倬別

用未赴而京師陷福王立南京拜倬工部右侍郎請裁省御用几榻及官殿陳

設金玉諸寶明年二月拜刑部尙書國破投繯死明史卷二七五

周宗建續侯志由進士銓授武康縣令上臺以其廉明兼署德清知縣興利除弊

振興文教卓然有治聲後調仁和擢監察御史天啓中為魏忠賢黨所誣死詔

獄崇禎初贈太僕寺少卿賜諡忠毅在德任時愛城北五石菴之清幽而屢過

焉手書廡林勝蹟四大字揭之楣間時有勢豪強佔武康銅山寺僧資產者僧

訴於案為懲勢豪而斷歸之讞語藏寺僧所字係硃書秀媚挺勁與五石菴額

德清縣新志

卷七 治行

二

相似吳人憫其忠而慘死肖像而祀於家聽雨軒

侯元棐續侯志任德清時以祖父在署訓誡節操彌厲考滿陞內閣中書歸卒胡志

朱萬鎬續侯志字潔湘桐鄉舉人順治中署德清教諭講程朱正學為正誼社以

課士士彬彬化之歷九年遷任樂陵及歿葬邑西烏鳶山之南麓及門私諡之

曰正誼先生徐少宗伯倬為立諡義胡志

李賡芸續周志字生甫又字許齋江蘇嘉定人乾隆五十五年進士補孝豐縣五

十九年調德清縣所在皆有惠政學經堂集良吏李君傳蒞任周歷郊外見攢殞纍纍多

無主者惻焉傷之首捐廉俸經理揜埋又籌經費存典生息以為經久之計籌

畫救火事宜數條慮深計遠均刻石示後周志載碑記嘉慶元年調平湖巡撫阮元

奏舉賡芸為浙省第一賢員升同知歷官福建布政使學經堂集

周紹濂續周志字敬巖直隸大興人乾隆四十四年舉人由安吉縣調繁嘉慶元

年知德清縣悃悞無華以安靜爲治邑舊有清溪書院經費不足無肄業者紹濂捐俸延師士頗德之重修織簾先生祠以風厲末俗邑志自侯元棐後百年不修紹濂延徐養原等纂修續志體例謹嚴十年以病去官不能歸寄居蕭寺中邑人饋以束薪斗米不受

周志參耐冷談

十二年復任操守如昔

廖宗元字梓臣湖南寧鄉人道光丁未進士己酉來知縣事是年大水成災詳請放賑勸殷富輸捐散粟聽斷坐大堂便民觀聽嚴於緝盜境內肅然整治育嬰堂諸善政咸豐十年調署歸安知縣有政聲時槍匪徧地集賭劫殺頻聞官吏莫如何宗元親督吏卒往來擒治匪徒相戒不敢入歸安境明年賊自廣德趨長興民心洶洶不知所爲宗元曰賊易與耳湖城據形勝可戰可守甯坐而待斃乎遂與官紳定議固守宗元有機謀家居時練習兵事故布置非非賊至屢卻遂趨杭州四月賊再至圍城三面宗元夜率精卒百人亂流而渡直搗賊營賊自夢中驚起保體四竄生擒四十六人斬級百是役也賊連營數十里衆

號十萬以昏不辨官兵多少驚擾達旦遂解圍去時巡撫王有齡多歸功於趙景賢而湖城百姓則惟宗元是頌於是有蜚語上聞者解宗元任會浙東事急以宗元能任勞怨檄署紹興府事紹興民不樂城守奸民又造作謠言以宗元爲僞毆之幾殆未幾賊至遂被害事聞賜卹如例

府志參采訪冊

高樑材字朱門廣東人咸豐四年任愛民如子聽斷苦勸不用刑威是年所收漕米因潮濕霉爛不能起解以原籍田產變價備抵上臺不悅記過去任劉蘭敏字立齋安徽旌德人同治四年由舉人來署縣事是年匪亂初平地方蹂躪民困未蘇蘭敏至先設粥廠以救災黎繼建大成殿以培士氣教養兼施士民頌德後補海甯州去子廕章兵部車駕司主事孫景范以孝廉得知縣分發直隸咸謂報施不爽云

周雲章四川新都人咸豐辛酉拔貢同治十三年二月署任能文而好士觀風童子試扃門面評取材悉當乾元寺僧師徒與紫金菴尼相塵聚一夕師暴卒

於尼所衆疑尼將困之勘審數四無確供久之廉得其情係徒置毒於餅而斃其師尼不與同謀者乃嫁尼而科其徒以罪倏以丁憂去

汪昌字詠之江蘇吳縣人同治辛未進士光緒七年秋來知縣事德邑民間完漕向有以斗米作九升四五合者有以斗米作六升四五合者其中苦樂不均令一概遵二五加耗例完納豈知向以斗米作九升四五合者不允聚衆喧鬧昌存慈愛心不忍懲未加耗而收虧米甚鉅甫到任無力賠償憂患成疾卒於任

陳鳳誥字紫元廣西桂平人光緒十四年冬由舉人來署縣事次年大水成災詳請給賑並勸殷富輸捐散米開設粥廠以救飢民并請以工代賑修築上下水城開濬城河修理險塘並改築石塘六十丈使塘內之田無水患聽訟平允一訊能了案去之日遠近鄉民遮道攀轅出於至誠補授象山卒於任

張縉雲字漢章福建光澤人由舉人出宰江山縣適有毛烈女事縉雲訪得其

實表節烈懲奸惡悉如律江山人民口碑載道俞太史樾賦詩誌之光緒二十一年調任德清禁賭博辦痞棍不事輕縱閱年四月十六日北圩風災吹倒房屋數百間壓斃七十餘人受傷一百八十餘人詳准上臺撥洋三千元會紳募賑撫卹備至後署餘姚旋授昌化未到任而卒

春在堂參  
采訪冊

德清縣新志卷七(續)

人物志 一統編

昔章實齋氏有言無經之傳文人之集也無傳之經方州之志也自司馬氏以人別爲篇標傳稱列而列傳所由名矣州縣之志論次前人特編列傳蓋創例也沿及唐宋名家文集中紛紛多傳體志乘采之降至於今據次叙列亦固其宜惟序傳非一例也其列題歸類節取所長者如儒林循吏等因事重於人初不爲施孟梁邱龔黃卓魯諸人而設也按諸吾邑侯志分治行儒行以迄方技釋老此其例矣且同一篇中互爲詳略傳甲而兼傳乙者史亦多見如陳餘傳中并詳張耳之蹟管晏政事備於太公之編周志亦近似之然其人之可傳不止一長撰述者已臚列其事迹所謂不可以一節概者當原其用意不爲類括不撰別傳仍當專列以備史家之取材范史列傳之體人自爲篇篇附以論此今志人物傳之所以有統編也

德清縣新志

卷七  
人物

五

列傳

沈浚傳

陸蒙龜

沈浚字叔源吳興餘不鄉人勸之子涉學有才幹太清二年遷御史中丞時臺城爲侯景所逼簡文使叔源往謂景曰大將軍意在得城城內尙有兵糧若不能決戰亦可深壁自守大將軍十萬之衆將欲何資景橫刀於膝瞋目叱之叔源正色曰河南王人臣而舉兵向闕今朝廷已赦王罪結盟口血未乾而復翻背浚六十之年且天子使也奉命而行何用見脇徑去不顧景曰是真司直也夫隨讀子史至此輒然而嘆曰昔紀渚之養鬪鷄也望之似木鷄矣異雞無敢鬪者其神全也正夫奮身雄入九軍白刃交於前而目不瞬者其氣專也專氣致柔柔而能剛易曰履虎尾不啞人亨又曰武人爲於大君其叔源之謂歟向非神全而氣專料虎頭編虎鬚幾不免虎口哉

沈約傳

姚察

沈侯諱約字休文吳興郡之餘不鄉人少因家難貧而篤學晝夜不釋卷母恐其以勞成疾常減油滅火而晝之所讀夜輒誦之遂博通羣籍善屬詩文起家奉朝請濟陽蔡興宗聞其才而善之宗爲郢州刺史引爲安西外兵參軍兼記室宗謂子曰沈記室人倫師表宜善師之又爲荊州征西記室參軍帶關西令興宗卒休文始爲安西晉安王法曹參軍轉外兵參軍並兼記室入爲尙書度支郎齊初爲征虜記室帶襄陽令所奉之主齊文惠太子也太子入居東宮爲步兵校尉管書記直永壽省校四部圖書時東宮多士休文特被親遇每早入見景斜方出當時王侯到宮或不得進休文每以爲言太子曰吾生平懶起是卿所悉得卿談論然後忘寢卿欲吾夙興可恆且入遷太子家令兼著作郎遷中書郎本邑中正司徒右長史黃門侍郎時竟陵王子良秉政雅好士與休文范雲蕭琛任昉王融蕭衍謝朓陸垂並以文學見親號稱八友時以爲得人俄兼尙書左丞尋爲御史中丞轉車騎長史隆昌

元年除吏部郎出爲寧朔將軍東陽太守明帝卽位進號輔國將軍徵爲五兵尙書遷國子祭酒明帝崩政歸冢宰尙書令徐孝嗣使休文撰定遺詔遷左衛將軍尋加通直散騎常侍永元二年以母老表求解職改授冠軍將軍司徒左長史加征虜將軍南清河太守梁武在西邸素與休文遊舊及建康城平引爲標騎司馬齊中興二年梁武位相國進爵梁王勳業旣就天人允屬內有受禪之志休文進曰今與古異不可以淳風期萬物士大夫攀龍附鳳者皆望有尺寸之功以保其福祿今兒童牧豎悉知齊祚已終莫不云明公當承其運天文人事表革運之徵永元以來尤爲彰著識云行中水作天子此又歷然在記天心不可違人情不可失苟是歷數所至雖欲謙光不可得已梁武曰吾方思之休文曰公杖兵樊沔此時當思今王業已成復何所思昔武王伐紂始入民便曰吾君武王不違民意亦無所思公自至京邑已移氣序比於周武遲速不同若不早定大業稽天人之望脫有一人立異便

損威德且人非金玉時事難保豈可以建安之封遺之子孫若天子還都公卿在位則君臣分定無復異心卒難圖耳梁武然之休文出召范雲告之雲對略同休文旨梁武曰智者乃爾暗同卿明早將休文更來至期休文先入梁武命草具其事休文乃出懷中詔書併諸選置梁武初無所改俄而雲自外來至殿門外不得入徘徊壽光閣外但云咄咄休文出問曰何以見處休文舉手向左雲笑曰不乖所望有頃梁武召范雲謂曰生平與沈休文羣居不覺有異人處今日才智縱橫可謂明識雲曰公今知休文不異休文今知公梁武曰我起兵三年矣功臣諸將實有其勞然成帝業者休文與卿二人而已時休文位散騎常侍吏部尚書兼右僕射及梁武受禪拜爲尚書進爵建昌侯食邑千戶又拜其母謝氏爲建昌國太夫人奉策之日左僕射范雲等二十餘人咸來致拜朝野以爲榮俄遷尚書左僕射尋兼領軍加侍中天監二年丁母憂輿駕親出臨弔以休文年衰不宜致毀遣中書舍人斷客節

哭起爲鎮軍將軍丹陽尹置佐史服闋遷侍中右光祿大夫領太子詹事楊州太中正關尚書八條事兼尚書令屢表陳讓改尚書左僕射領中書令前將軍置佐史尋遷尚書令領太子少傅九年轉左光祿大夫給鼓吹一部休文久處端揆有志台司論者咸以爲宜梁武終不用乃求外出又不可與徐勉素善遂致書於勉勉爲言於帝請三司之議亦未見許但盛加鼓吹而已休文性不飲酒寡嗜慾雖被遇隆重而居處儉素立宅東田矚望郊阜嘗爲郊居賦以見志尋加特進光祿侍中少傅如故其身瘦骨勁肌潤俊偉左目重瞳腰有紫痣聰明過人好墳典聚書二萬餘卷京師莫比少時貧貸於宗黨得米數百斛有族人侮之休文曰我時雖困豈無通日遂覆米而去及顯不以爲恨舉爲郡部傳嘗侍讌有妓師是齊文惠宮人帝問曰識座中客否曰惟識沈家令休文伏座流涕帝亦悲焉爲之罷酒休文歷仕三朝賅悉舊章博物洽聞當世取則謝玄暉善爲詩任彥昇工於文休文兼而有之初武



帝有憾於尙書僕射張稷及稷卒帝與休文言其過休文曰尙書左僕射出爲邊州刺史已往之事何足復論帝大怒曰卿言如此豈忠臣耶休文懼以疾卒於官生宋元嘉二十年八月十二卒梁天監十二年八月十五享年七十有一詔贈本官賻錢五萬帛百疋諡曰隱歸葬邑之蘭村建祠世祀于湖休文嘗以晉氏一代無全書年二十便有撰述之志宋泰始初征西將軍蔡興宗爲啓明帝有勅許焉自此踰二十年所撰之書方就凡百餘卷條疏雖備採綴未周永明初遇盜失第五帙又著宋書百卷齊紀二十卷梁紀十四卷諡例十卷宋文章志三十卷文集一百卷及四聲譜並行于世自古詩人屢千載未及作而休文獨得其妙帝曰何謂四聲曰天子聖哲是也其子二長旋次旆旋字士規以父廕襲位司徒右長史太子僕射孫衆字仲興亦善屬文帝製千文詩仲興爲之註後又召見文德殿令作竹賦立成奏之帝手勅曰卿亦文體翩翩可謂無忝爾祖累遷太子內舍人贊曰位高而德重才

偉而文雋郊居之賦不遂其恬退之興四聲之韻乃益其道望之尊

沈立傳

莘稼軒

宋神宗時河決劉家口負薪填壑自守令大吏以至水衡使者張皇無策於是都水監使大禮乃籌隄防護甕閘創著河防通議治河者得奉爲指南且歷事三朝白首一節大禮名立姓沈氏讀詩書數萬卷然獨喜酈道元水經以故江河得其詳其備述國朝名臣錄河防諸書予常幸其第覽其書曰富哉南面百城不是過也時嘉定二年焉

沈鉞傳

蔡汝楠

沈大賓吳之善士也其先世居玉塵山明初曾祖參贊基側之王氏迄三傳大賓始生幼有志行克盡孝友及長學問弘博不求進取其叔居正詰之曰汝負雄才坐延歲月盍不援上舍以膺一命之榮乎曰貴人之所欲第有甚於此者故不爲耳曰奚爲曰昔者季路之事二親也甘藜藿之食爲親負米

百里之外其後南遊於楚從車千乘積粟萬鍾然其事親時初不敢以此移志今鉞也兄弟俱已他適二親無侍且上舍途遙又安敢忘親而圖青紫是時大賓長兄純齋胄監南宮季弟芳墅司牧宜陽故云然由是宗族甚器重之其事親也不離左右親有怒愉顏以解之疾躬炊湯藥先嘗而後進尋常問寢視膳食必請餘所以養志而承歡者無不竭力孟子曰事孰爲大事親爲大大賓其盡之矣及親卒號痛不勝飲食不沾顏色慘悴幾不能自存族人以禮諭之者數四遂稍節居喪曲盡禮三年之內人不聞其笑言雖服闋常覩物而感慟鄉里皆化焉無有忤子卽郢封純孝亦曷過哉又于兄弟間雅和埴箴嘗植荆於庭側以示志故迄不析家及弘治甲寅其兄鈍齋殞躬徐州大賓慟哭曰手足大變如之奈何遂親至死所招靈刻像以錫匣盛歸用棺殮葬遺孤曰淳甫是時方幼穉善撫字之過於己子延師訓誨期以成人遂補博士弟子至其析家於弟侄則將父產二分之一與芳墅而一與淳

甫而已一無所取也復以侄之廳宇未臻壯麗捐金五百重新之又將百金與弟構其書齋務極精美其事行口耳於吳中非惟縉紳慕之卽農夫野老亦讚誦之不置也嘉靖初方君體道來蒞茲土考德表貞偉大賓之孝弟乃述其行薦聞院道特錫冠帶旌其閭後更敦請大賓者三善人是富徐積粟帛此之謂歟大賓名鉞字衛卿德清人

沈鑾傳

陳 霆

沈鑾字節卿號芳墅乙酉歲四月之四日其發祥也少聰敏嗜詩書賦性豪邁而堅正才能冠世年十四泮宮奏凱負有才名鄙當時勢利嘗曰富貴吾所自有彼衣冠土木銅臭錢虜祇貽羞耳又善詩賦或與朋從遊宴高吟竟夜不倦適歲試隨食餼廩當是時十有七矣嗣後每試輒首選名著吳中有願受教從遠方來者數十人均辭焉曰人之患在好爲人師況余疏漏自媿有負三餘嘗自切責敢以自欺瀆諸高明來者固請之曰業精於勤成於一

破釜沉船終獲有濟。碁酒謔笑實敗厥功。諸君不鄙敬以一言相勉。積數年賓貢。選申復入太學。意謂易小試捷。大物竟以數奇。屢蹶場屋。嫉世憤俗。無以自抒。常沉吟感嘆。不能自己。居久之。有命丞東河縣。地屬山東之兗州府也。綜理繁劇。若運諸掌。時以禮義仁讓勸諭百姓。自是閭里恬熙。嘆息愁恨之聲杳乎其不聞也。未幾丁外艱。歸邑民提携而送者。滿於道。服既除。再丞古閩。延平之順昌。甚以難治。稱而能以長才繼之。興利除害。惠澤生民。見惡必擊。既俊弗追。迨及聽斷。洞見端倪。按法而行。無敢少屈。然未嘗濫其刑責。苟罪一人也。遂并錄縣事公愼莊敏苞苴道絕。豪右斂跡。申革沉濫之弊。德化孚洽。遠近歡呼。聲實丕著。撫按交薦。擢補河南宜陽令。乃於嘉靖甲申之七月旬有八日。以疾卒於官。百姓號痛之如赤子之喪其慈父母也。子二。永貞。季濬。迎喪卜葬於司馬山陽。嗟乎。焚膏繼晷。百家學博。才曠世莫與京。乃竟艱阻亦命也。雖然。學貴有濟於時。夫以大賢司百里。卽謂小試。鷄刀

而政績屢建。其才亦稍展矣。又復何憾。爰作短騷一章。以表于無窮。其辭曰。麒麟兮降祥。東壁耀兮文光。枳棘森兮棲止。絃歌發兮醇良。值大故兮言旋。填祖道兮難忘。繼花村兮譽隆。稿苗興兮飛淙。遇豪猾兮是鋤。撫三尺兮色愴。仁愛浹兮百里。寵擢錫兮琴堂。慨英雋兮在泉。流德澤兮云長。

沈鶴齡傳

沈亦然

沈鶴齡字海籌。德清縣之新市鎮人。予共五世祖兄也。嘗慕張騫乘槎入斗牛。事故又號銀槎子。幼不慧。日讀書三四行。引喉呶唔。頸面盡赤。及掩卷卒。不能誦一字。好以片紙置書下。作繪事。貽同塾兒。畫人人肖。畫蟲鳥蟲鳥肖。師見之。威以夏楚。弗止也。後移家杭州。悅寫貌者。陳蒼霖。遂往受業。陳故擅名久。初以爲庸弟子耳。已而漸奇之。期年後。遂不勝衛夫人之泣。既卒業。不敢自炫鬻。曰。奈何奪吾師衣食耶。間爲戚友所矚。始一展技。尤善於臨撫。古人仙佛神鬼及龍虎鸞鶴之屬。氣韻骨法。落筆成真。或自出機軸。亦深得古

人妙意以是出藍之譽日起益愀然不自安去遊嘉禾姑蘇兩郡間所至輒爭致然不受迫促一畫或數年不成有欲速就者給之去閉深齋中而扁其外戶焚香淪茗飲饌唯所欲多陳列名畫佳硯其摩抄贊嘆者卽奉爲潤筆資然後伺間語之初甚艱然既知不可出遂留二三日爲成之而去性好遊稅駕必窮極佳勝衣履喜奇古不久卽棄去更爲之故所得緣手盡至老不解治生產有金陵富人某挾萬金來新市買絲耳銀槎子名因所主者延之往儀節頗闊略中作設飯又不具賓主禮銀槎子推案而起曰來來爾貌不敵一駿驢顧欲畫工我耶又讓所主者君誤我令筆墨作十日惡遂袖所畫紙趨出明日富人歎門謝禮益恭銀槎子卒不顧居間者請以多金畢繪事笑曰吾安用此儻來物雖然留之祇穢吾屋姑取而頭往身不可得也富人雖媿怒卒陰喝不敢出一語持所畫紙逡巡去銀槎子以是益厭爲人畫乾隆甲辰予令直隸之南宮縣銀槎子欣然攜琴硯而北是時別六七年矣洗

塵掃榻相對極歡每飯罷出囊中硯材磨琢之或鼓琴一曲翛然自遠間爲予佐理碎務亦竟不辭有以銀槎子名聞上游及鄰郡縣咸致書予俾勸駕銀槎子曰一富兒尙辱我况青油幕下面孔耶竟不往尋予改令豐潤豐潤饒山水銀槎子時跨欵段出遊遇幽奧險峻處輒攀捫而登東望遼海西顧田盤諸山竟日忘返又數往京師詣小市覓古畫硯時亦有所得庚戌予自大成引疾買屋新市兩家相距數十武朝夕過從不異疇曩語及北遊尙悠然神往有勸其重理舊業者曰少壯尙不堪况視已茫茫乎或有如前所云給之亦一笑而已丙辰秋右體忽不仁臥牀第久性益卞急時欲引刀自刺曰方恨不能乘槎泛天河乃使我至此極耶竟鬱鬱死時丁巳六月八日也銀槎子天性放曠凡人世境遇之豐嗇子孫之賢不肖舉不復在念口吶吶如不能語又善忘有詢其年者輒瞪目不能答相狎者以是爲戲笑及其含毫舐墨心靈手敏古畫過目終身不忘與其人殊不類異矣昆弟間最稱雍

睦家事皆兄鳳翔肩之故雖生產不治卒以成其放曠云年五十有六有丈夫子四人孫二人論曰業於畫而去富貴也若蘇毋乃欲贏而惡囂乎然不如是銀槎子亦一凡畫工已耳惜其生平所作不自收拾又往往不署款數十年後寧尙有知之者耶悲夫

費桐傳

海寧馬瑞熙

費桐字生陽號丹書德清新市鎮人父天麟爲國子監生有孝行卒時桐生甫三歲母朱撫孤甚嚴切嘗以坐置膝上口述先德並祖宗勦業之艱勸導以古今善惡果報以培其基稍長命從族叔讀叔亦族望也尋受知於督學使者南海羅公目爲偉器故桐爲諸生食餼力學不少懈惟恐負羅公知咸豐季年赭軍犯浙江桐與同邑馮壽鏡蔡兆騏鍾丙熙等同建保衛桑梓之策助邑宰設鄉團事平積屍填原野存者將餓殍復邀族弟松蟻金萬兩立義社力任掩埋之役並施粥及絮褐全活甚衆邑宰具其狀白大吏欲薦於

朝桐曰敬桑恭梓乃士之常耳豈藉以沽名乎固辭不受馮蔡輩後皆爲縣令桐獨以諸生終蓋生平惟知與人爲善於朋友宗族間苟有一人言行非禮必規其悔過而後已不自覺其聲色之厲也事後則友愛如初無他腸歲科鄉試外未嘗至官府其梗直狷介有如此每日言行必錄日記與武康王誠桐鄉嚴錦鈞昆季烏程張楨同邑戚人銑族弟楨模爲文會同治朝儒生講習專尙帖括之學所謂墨卷者無非勦襲雷同雄唱雌和於聖人大經大法無有得其芒芴者桐獨憂焉謂文運與國相維繫力矯老生腐儒之習每制藝必探索聖賢之奧蹟尋繹宋儒之旨趣引伸觸類剖析毫釐嘗取古人載籍沈浸釀郁擷其精英謂非若是迺貽膠庠羞又通律呂之學尤究心六法然不以此示人人莫知之邑中文廟落成告祭之日桐從而瞻拜燭花忽幻成仲由在三字衆詫爲奇異因度桐後必大顯然桐卒不顯時論惜之子燮宸邑廩生行誼力學有父風

贊曰自軍興以來英髦輩出由膺民社而至建節鉞者不乏其人養氣讀書不求聞達者百不能一二而桐獨植行敦品不以富貴易其操亦近世之獨行君子也觀其祭聖見異知非偶然也况天之報施自來弗爽不顧於及身者後必有興起焉故論次桐之事而豈無厚望於費氏乎

徐振綬傳

許祖京

徐振綬字起芬礬礬其別號也子丹長孫訥齋長子性英敏讀書手不釋卷每下筆輒洋洋數千言將應童子試適因叔冠聲以保舉選任甘肅之碾伯縣親朋無與俱往者遂援例入成均隨之任簿書案牘襄贊參理倚之如左右手後旋里事親以孝家貧脩脯所入以甘旨進菽水承歡怡怡如也訥齋捐館年八十餘振綬年亦過艾其哀毀擗踊視少壯過之待兩弟映豐用圃極友愛至老未嘗析箸又嘗以不獲自奮功名爲歎故於子若孫也望之切課之嚴子綬園爲食餼生有聲饗序而孫愚泉亦早歲遊庠皆義方之教也

爲人沉靜廉正言笑不苟雖盛暑必端服危坐遇交友子弟必教之以正能以嚴憚啓發其志至於居家以儉處己以謙御下以寬接物以信懿行難更僕數古之所謂鄉先生者意在斯歟

徐天驥傳

許宗彥

徐天驥字德士號松塢恕齋之孫芑泉次子也襁褓時卽善病四齡就塾終日危坐無戲容八歲喜讀左氏傳于諸長篇尤能尋其脈絡考其訓詁塾師恆異之年十九補弟子員作文不事雕飾洋洋灑灑自露性靈己卯科試冠邑士以詩文受知於諸城寶東皋先生庚辰舉於鄉辛巳會試錄取內閣中書癸未成進士以部屬用簽掣戶部分雲南司額外行走天驥以文章政事豈有兩途居官而不盡職自問心何自是辯色而入日晡而出寒暑無間稿無大小事無鉅細必與同事虛心商榷有所見不敢固執自是然亦不肯稍事依違以徇人丙戌實授雲南司主事年三十二卒於官性孤立寡交游不

畏強禦人或以勢怵之無所動與人言不合必力爭之以故多不稱人意然居心伉直無城府久與人處亦咸釋然無間言

徐瑋傳

錢唐梁國治

徐瑋號藥渚茗溪人也自幼以力學著年未冠補弟子員及舉於鄉而學益篤自後公車屢困至壬戌歲始以賜進士授編修年已四十餘猶手不釋卷嗣值高宗幸翰林院得隨諸公卿後以次聯句恩賞便蕃蓋文章報國之志至是益切矣余自幼居京邸聞名久因脩弟子禮受業數年歲丁卯藥渚典試貴州得士最盛其學識於此益見越明年余捷南宮雖一時遇合然得於師教居多方冀公暇可長侍左右乃未幾而藥渚賦遂初時長公子鵬南次鶴齡先後登賢書當北上相遇備詢其起居因知好學之志至老不衰始應吳興書院聘繼應穎上書院聘後又應湖北書院聘一時遊其門者非登巍科卽成名士蓋引掖後進之効至是益盛矣余以歷任內外不能復從遊後

乞假歸里道經茗溪謁於仙潭之謝家園承攜其二孫與余話舊日事亶亶不倦又進謁其太君車孺人舉止言語有鍾郝風及出仰瞻堂宇見有本郡太守曹掄彬贈其大父越三公額云世德型芳余雖不及見越三公然以知其出處大節淵源於庭訓者遠也茲歲春余扈方蹕南巡留省數日訪知藥渚暨其長子俱已赴召玉樓惟次子任青田廣文各羈職守不獲一把臂爲憾夫以師門學術與其世澤卜之其後人必有能繩祖武而振家聲者余老矣請拭目俟之（按此傳就原意刪定）

徐以坤傳

嘉禾錢載

徐以坤字穀函號根苑又號茗花九歲能屬文十五歲郡試得首拔補官學弟子一時諸名流胥引爲忘年交丁丑春翠華南巡恭進迎鑾詩冊召試行闕拜文綺荷包之賜戊子領鄉薦連上公車被薦不售循例授國子監博士恭值詔開四庫館八年首部全書未成大學士于文襄公程文恭公疏薦以

原官充武英殿總校先派文源閣閱書總裁器之復以第三分文津閣書派閱自己亥至甲辰六年疊蒙尙方之頒書成議叙主事增秩五級晉授中憲大夫辛亥引年歸里改歲終於家性樂於爲善歲贍族之貧者計口給粟藥其疾殯其死單煢者完聚之幼稚者延師教讀之自奉極儉約布被繩牀俛仰自得性好書籍坐緹室中日事研究不徒充椙滿架也葬武康烏回山

徐以泰傳

無錫嵇璜

徐以泰字陶尊號柳樊又自號晚聞居士質穎悟九歲善屬文長喜吟咏與杭華浦厲樊榭王穀原王西莊汪厚石桐石萬栢坡把臂入林爲詩社友著有綠杉野屋詩集四卷探入四庫全書總目屢困南北闈數薦不售遂循例授山西絳縣知縣不名一錢剔弊懲奸案無鉅細卽審訊親書斷語暴其曲直無分毫混淆有神明之頌而尤爲邑民所敬畏者莫如更正甲戶一案縣屬地糧冊開列里甲沿明季陋習以先入甲者爲前戶後入甲者爲後戶前

戶倚勢積威視後戶如奴隸或遇事遣撥或借端歛派凡前戶家有吉兇事故後戶捧盤執爵奔走惟命甚且後戶人亡系絕惟聽前戶主裁或嫁其妻佔其產徙其墳墓親族莫敢過問以至各里雖有缺額之甲戶後戶儘可攢補前戶惡其不便於已把持挾制積重難返雍正年間雖節經嚴禁而害未除來宰者恐多事輒隱忍以泰廉悉其狀力任更正與大中丞明公侃侃力爭明公深韙之嘉其有膽有爲通飭各屬有如此者悉照絳邑更正未及俸滿卽題請調陽曲縣惟以清慎勤自矢時大中丞明刑弼教明察秋毫以泰勘獄平反不可枚舉旋蒙陝撫明公隔屬薦舉例保題堪勝知府而署撫亦保陞太原府同知未及赴部戊寅歲因積勞成病乞請歸里展烏鳥之私叙天倫之樂閉門卻掃日以詩卷自娛雖囊橐蕭然而自甘淡泊况味寂寥處之欣如也著有續詩集六卷詩餘二卷綠杉野屋類橐六卷未付梓藏於家卒葬於錢塘縣大雄山里子二長秉愿中書科中書次秉懿丙午科舉人河



南新安縣知縣

談信傳

長城臧瓊

談信字彥實松隱其別號也以布衣屏跡坵壑獨能引先世之教以自繩沈默純厚終身未嘗有睚眦父士遠伯兄真姪俊已成進士而信居庶孽益自檢恂恂如田家子父以為不類也且時未生子育五女終慮其藉為壻家資乃使居確坊中破椽不蔽風雨擲斗粟與之使其自饘粥瘠田十畝而猶望歲也其貲田視伯兄不及什一而信怡然處之事父益孝謹朝夕候寢饑無缺與兄真更友愛無間其所得於詩書禮樂之教者蓋深矣當斗粟垂盡而十畝未耕其誰不扼腕撫膺以請命於父兄而信曾不見顏色蔬食菜羹孝友不替性殆植於天者耶未幾生子仁孫應祥日蒸蒸起足不重父慮晚歲行益著邑長廉其賢奉以鄉飲賓席孫以經術紹門戶享年八十有二

談儀傳

蕭鳴鳳

談儀字時正天性素高樂有父兄之賢愈加警勵毅然以古人自期及長力行孝弟檢身型家內外肅然下至臧獲無不得其任者自奉菲薄歲時供祀極洗腆事宗族長老必盡誠敬御卑幼則修寬裕開導之義或罹患難則力為扶持俾無失所慕賢達好施與子孫始勝衣即令出就外傅擇稍長尤秀敏者俾治舉子業且資遣焉其所交遊皆一時知名士居鄉則恂恂如不及或競持曲直得一語而訟遂息弘治間有倉官劉姓者會計失當而鬻女以償儀為抵其闕骨月賴以全鄉鄰困乏者周之婚喪不舉者助之凡輿梁道路亦為倡舉一新無靳色比鄰兩遭回祿儀居獨存兩舉鄉飲賓當道書匾旌表儀聞之蹶蹶不甯曰過情之譽某豈敢當卒年七十有八

蕭鳴鳳湖廣督學方志

戴福謙傳

俞樾曲園

戴福謙字貽仲琴莊其號也世居湖州德清縣遷居郡城本宅羌山浮家嘗水祖晴巖公肩吾七十以外能辨細書父銅士公薛瑩四五之間自成高品

綵繩圍宅青箱傳家次何氏大山作姜家仲海其身鱗立其才鳳鳴虞龢讀  
書被池盡溼魏收好學牀板爲穿製月儀之辭彥升幼慧作日出之賦維翰  
才高以弱冠舉茂才斯時也高密侯教成諸子都知名武夷君笑對羣孫  
便堪忘老芸香三代花萼一編何其盛也無何福謙之兄駿伯芬弟羹叔純  
鐵網未收金棺遽掩揚椿愛弟食必同盤劉璉敬兄衣常束帶一旦阿干絕  
唱卯君罷呼固已貯苦停辛乾肝焦肺然而平子多愁益工著述復愚行役  
不選文章以爲九据三摹元理乃出千辟萬灌劍氣自精故其爲文浴素陶  
元雕今潤古有顏延年之明密無揚子雲之艱深有許舍人之中無枚少  
儒之歇散時館臨平孫氏樾亦祛衣受業焉每見其動墨則錦橫彈毫而珠  
落崔浩思苦至與鬼爭道衡功專惡聞人語袁嘏之作大材迨而猶飛張紘  
之文小巫見而盡走固知不能祕珠光於魚腹損蘭本於麋醢也丁酉歲舉  
於鄉駕一封輶從兩計吏此行也人以爲寫洞簫之賦漢殿爭傳奏寶劍之

篇唐宮動色矣而乃翼殷不逝風引仍回登金園以無由著銀袍而將爛欲  
歸則他日之辦裝非易欲留而此時之索米良難不得已以獻賦之相如爲  
授經之郭瑀以停都之元度爲入幕之郗超蓋留京師者三載客鄆縣者一  
年萬柳堂前聚青雲之仙客千秋亭畔拜赤伏之遺祠宜乎駭馬遊豪吹鞭  
聲壯然而蕭條賓館茶殘酒冷之場飄泊窮鄉墨瘁紙勞之感出則長勒鞞  
敝入而缺勝衣單青氎已分長寒墨席并難暫暖往往浮雲善幻散雪難團  
寄客土於浮根棲輕塵於弱草眼中有鐵孔文舉方薦禰衡刺上生毛何長  
瑜仍還靈運人情反覆生意婆娑歲在庚子再試春官吐珠於澤而爭含蒙  
金以沙而愈耀已幾乎列樊川於異等冠盧肇於蓬山而五角六張良時易  
失三塗八難魔劫難除先是戊戌會試取教習至是復薦而不售看人袞袞  
畀予區區兩度龍門一場鹿夢嗟乎郭舍人之矢激而仍還劉寄奴之盧呼  
之不轉元稹篋內竟藏不第之章李廓榜前難制無言之淚憤泉暗湧悲火

潛燒其病自此繇憊矣奴無吉利孰與分香友有真長聊同稱藥魂遊東岱  
目斷南天於道光二十年某月日卒於京師年三十有三嗚呼傷哉夫秉醇  
粹之性具儻蕩之才天骨不羣神峯高映韓嬰心細處事分明管輅論高占  
年果應一時推襟王儉捧手康成者靡不重劉輿爲長才呼鮑胥爲健士共  
祖士少語夜必失眠得沈休文來朝能早起而何意鼎方見泗繫已絕於重  
泉劍未破山鋒先摧於庭石名不酬其學遇不副其才彼夫款啓之士踈煢  
之徒白帖多訛赤泉莫辨或且身據要路壽享大齊焉抑何天道之難知而  
人生之多舛乎且夫景惠陰德罕樂陽施皆以長世遐紀炳然史策而如戴  
氏者世守伏生之不鬪山名劉氏之後隆仇汜毫而猶恭周燮髻而知讓入  
其室勃谿盡絕登其堂臧甬皆歡宜乎純仁遊佛地而常寬刁肅生福門而  
不死矣乃駿伯最先溢逝僅留曙後之孤星羹叔相繼淪亡并失海中之仙  
果惟已有中郎之後可興趙氏之宗庶幾炊種猶留書香未斷然而纔離雍

樹便拜厥旌縱存晏子之遺書孰理荀君之後事至使山公已老別艱難休  
甘石著書米鹽凌雜傷矣明年戴氏之喪至自京師休夫費重孤子迎難幸  
藉慈航得歸先兆颯南風而不必招左轂以無從一別千秋往歌來哭嗚呼  
哀哉論者猶謂既上書報罷獻策未收何妨歸乘殼鯁之車舞著斑斕之服  
禹珪下第詩酒寄情許孜孝廉褐巾終老顧乃六鑿相擾三縛不除竟天天  
年得無非達不知韜鱗掩藻者退士之思也邁辰選時者文人之志也士既  
不能伏處葭牆之下高臥蒿廬之中則王章泣於牛衣范蠡吠於狗竇亦人  
情耳性命之故天閼紛綸修短之期鳧沒欺魄雖王壽焚書而舞賈生養空  
而浮亦未聞玉鑰能堅鐵牙永固豈得謂之燠螽自燒鐸鳴致毀也哉樾之  
祖母乃戴之祖姑也故當垂髫之歲卽已執贄而從丁酉省試樾亦倖中副  
車喜小子之有造指遠道以爲期歧路屏營抗手而別猶謂人非鹿豕原無  
長聚之緣何圖歲未龍蛇遽痛哲人之萎編篋中之集有待他年受膝下之

經還如昨日九泉不作問叔譽其誰歸五事猶存非郭冲而莫記人謂高才不偶當登方干身後之科我知修德必昌佇立永叔岡頭之表

賓萌外集

### 沈上襄傳

潘穀

沈上襄者潭西退畚之長子也退畚爲諸生倜儻負大志上襄尙孩抱嗣觸痿疾服餌強起遂僂折曳踵其形支離矣每恨爲造化所苦故口吟手綴不輟上襄初名官虞幼穎敏授以章句數十行一過隨覆背無遺字退畚督之峻切寤寐與俱勿少間晨夕惟毛震股票而已然爾時固厚望之漸試以八比藝其族昆器車先生蚤奇之及髫始命名中階應童子科爲晉江劉就所拔充郡博士員壬午踰弱冠舉鄉其墨爲淮陰陳階六先生所賞薦列禮經之首臨安一吳叟者慕其才以女妻之是時四境方禍亂癸未以後乃息偃故廬不敢談天下事獨取河南紫陽象山姚江諸子語錄味之有得曲巷鍵門人跡罕至父子輒互相詰難其暢樂甚於師弟壬辰乘便轍客於冀亦倦

游嗚咽而返一女弟字於邑蔡氏未嫁而蔡子殤女承家訓不替請得奔奠終志焉上襄甚窘憊欣然假人數十鏹以過其行後歲餘女疾革忽向姑曰四郎邀我將從之矣姑與姆婢等訝云生不一面何由相識此譎語耳試詰以衣烏狀貌無不逼真未幾而瞑惟女志不貳故能感及泉靈洵哉堪與伯氏爭烈者也退畚天性豪上不屑儕俗年漸衰無一可意事又見其子不欲以冥冥墮行願出其詩若集於天下以一洩胸中磊砢愠鬱之氣奈貧乏而棗梨之役莫給也憂重食減僅訂前草十數卷囑其子藏於家上襄率諸弟侍湯藥彌歲神慘骨立及退畚卒喪葬拮据纒纒不能起至次年其嫡配章氏又先謝世是歲十一月客於武林抱疾歸迨明年戊戌四月勸極告殂年甫三十八也上襄之爲人端軀瘠而目光黝發口無漫言與賓朋會集但歛手默坐疑若有思一遇炎熱世態之徒卽引避告絕接二三知己辨析性學竟日反覆不厭所論立身必以躬行爲當平生不好虛譽孤拔峻厲正末世

獨立不懼之君子也然几牖翛然妻子凍餒有時晨炊失供不爲動容其高蹤峻節纘之古人又何愧乎惜也天嗇其報所施未榮嘉實垂成雹而中隕豈亦斯文之不幸而吾道之一厄也哉

俞林傳

程 森

俞林字壬甫號芝石幼慧以家貧不能延師父鴻漸恆客遊於外十歲以內母姚氏教之讀清道光二十三年鄉試舉人於本房居第一以工書法取臚錄會修清宣宗實錄預繕寫告成以例得議敘遂以知縣分發福建福建故瘠苦其時寇盜充斥紅巾賊方熾仕宦者視爲畏途督撫累疏請分發而部令發往人員率託故弗至林獨絜眷屬閒關赴閩逾年署沙縣知縣其地多訟胥吏緣以爲姦一小事輒株連數十人林於判決除一二要證外悉罷遣無所問所保全甚衆地又多盜有楊三者盜魁也其兄爲他盜所殺使人謂曰來吾復爾仇楊三乃率其徒降捕殺其兄者論如律於是羣盜懾服境內

悉平後楊三官至參將戰死汀洲得優卹焉五年秋充鄉試同考官民閉城請留夜啓北門去入闈閱卷每達旦不寐或既棄復取閱榜發得士胡夢得等十一人時澎湖通判闕員大吏意屬林而欲使出門下命福州守示意林以母老辭由是忤其意當是時閩中尙奔競習侈靡上下狎遊無度其善夤緣者以數十金得一官不數年擁符節林獨耿介遼落寮友皆非笑之已而御史林壽圖以閩中積習白簡上聞制撫方伯皆免官自道府至州縣凡二十餘人寮友始歎服六年署永安縣與汀州鄰其民交惡汀人有至邑者輒誣爲盜縛送官官不爲理則擁去毆殺之不能禁遇有執送者立出坐堂皇薄責之置諸獄以好語慰勸衆人使去乃出其人於獄衛之出境全活無算永安自被寇亂殘破特甚乃招集流亡使之復業又以地處衝要賊所必爭使民力護鄉里五日一集較其技藝課其惰勤鉦鼓旗幟悉合法度選勤卒千餘人皆精銳可用七年夏紅巾餘黨復爲亂據汀州所在嚮應七月陷連

城提督某與戰敗績退保延平於是將樂順昌沙縣尤溪相繼陷賊將長驅犯延平窺省垣而延平屬縣皆爲賊據惟永安獨存與延平相犄角賊攻延平懼林躡其後乃以大隊撲永安勢張甚按察使裕鐸督師來援而四面皆賊轉戰不得達是時外間訛傳縣官眷屬已宵遁母姚氏乃親詣城隍廟行香出入皆褰帷邑人士有以公事至者召使入內室則母方觀書妻方刺繡於是人心大定然苦無食乃勸富人輸錢粟券與之鈐以縣印數日間輸者頗衆而寇警顧日急母命積薪於門待自燔留民兵二百使千總率之登陴而自率兵出城列寨據要害檄鄉團隨所在助殺賊一日猝遇悍賊千餘人大呼奮擊無不以一當百賊勢且不支而賊援至分兵斷後林麾衆登山賊蟻附而上礮矢如雨有鉛丸摩頰過一持蓋之卒隕焉然士卒殊死戰賊不能上俄鄉團四集別隊兵亦有至者金鼓之聲震山谷賊驚顧林率衆自山馳下乘之賊大潰自相蹂躪澗谷者相枕藉是役也林軍二千破賊萬餘而

西路鄉團亦同日大捷軍威益震賊猶徘徊境上乃簡精兵佐以鄉團使繞出賊後擊其背三戰皆捷賊精銳略盡自是不敢復窺永安而按察使裕鐸亦次第收復所失諸縣戰守狀始得達時阻絕者三月矣裕得報送行省大吏傳觀相謂曰賊蔓延數州郡所至官吏輒委城走不圖一書生乃能死守彈丸屢挫賊鋒賊之不敢犯省垣蓋以此也特疏以聞乃有俞林力守危城三月深可嘉尙之特諭擢同知時連城猶未克裕攻之數戰不利有袁良者故武貢士殿試一甲第二以都司守連城連城陷省符下所在逮治之賊之犯永安也袁適至察其人猶可用示以省符勸自効袁曰敗軍之將生死惟公儻有所用敢愛其死遂從戰守頗得其力林以袁守連久習地勢言於裕用爲前部袁益感奮未浹旬克連城大府以上游肅清言于朝擢知府而袁亦復官積功至汀州鎮總兵九年補泉州府廈防同知部議以要缺宜調員補授不得以應升之員升補奏駁之特旨允焉下車後見積牘如山縲繫者

數百人旬日間悉判決之監司某嘗從容謂曰君治獄明敏然旬日決數百案得無太易乎對曰重案例移縣其歸同知判決者皆細故片言可折久懸不決徒飽胥吏無謂也某乃歎服時有兄子毆其季父者逮之急或請以三千金免其罪林陽許之密偵其出而拘治之凌兇者亦盜魁也爲鄉里患莫敢誰何按察使名捕之不能得林乘夜將徒隸掠之其家得焉凌獻金剛鑽念珠一串值萬緡峻拒之卽日械送省中凌至省竟得釋然終不敢歸時諸海口皆通商而廈門亦設外官號領事多恣睢不法其譯人輒魚肉民民怒執之領事率數十人持械至同知署林出問故領氣沮曰從公往取人耳林笑曰吾民皆循良守法焉用多人命一隸往取之須臾而至領大服自是益敬畏之每見必以免冠垂手爲禮事有不便於民者與反覆論辨往往折服中外讎集雖鎮道大員或爲所狎侮惟林在坐終席無敢譁同治三年八月赭軍李世賢陷漳州將由廈入臺偵知有備意稍沮乃餌土寇使爲內應而

羣不逞之徒亦趨趨欲起林出資募勇得四千人勢稍定適前任水師提督曾玉明以舟師千人將赴臺道廈門林登舟說之曰無廈門則無臺矣今日之勢廈重於臺曾乃留屯廈門時英法各國兵船十餘艘泊鼓浪嶼名爲自衛其意實叵測米利堅人白齊文舊爲常勝軍統領保至總兵官後降赤爲官軍所擒詔貸其死遂回國至是潛入漳州挾赭軍頭目二人至廈門匿領事館窺虛實一日領事招觀察飲酒半三人者出領遜就坐觀察大駭遽起命駕歸歸而謀之林林伏勇士於塗伺其出禽之械白文齊送行省肆頭目於市翼日置酒招領事諭以順逆禍福皆俯首聽命會間諜陳金龍以赭軍書至英領事館陳金龍者漳州人洪秀全未起事時嘗至其地與之爲異姓兄弟及是年八十矣詣李世賢自願爲李奉書說英領事圖廈門英領事懲白齊文之事執陳金龍以獻林白觀察置諸法以狀聞詔賜英領事獎武金牌一荷包佩刀各二下所司頒發林陳兵衛鼓吹輿從齎賜物至英領事館

領事再拜受出入佩之以爲榮由是外官爭爲遮邏有潛以軍械糧食濟人者悉縛送官中外之交合廈門之守益固閩俗故信鬼有巫者自信爲神所馮握利刀刳其腹血漉漉注盤盂不膚撓俄創合如故取竹箸百寸寸斷之雜碎齏咽之又或跣足行烈焰中均無所苦信者甚衆所至環問洪狀巫張目叱曰爾曹尙不去乎彼於某日至矣廈人皆聳一日林出道遇之大言如前命收之隸卒相顧莫敢動有騎者下而捽其髮乃仆之地言於觀察將以軍法斬之士民咸集爲之請林曰神如有靈我受其咎無與汝曹竟斬之訛言頓息時避兵者麇集力行保甲法躬自巡衛故戶口益增而盜賊絕跡惟米價翔貴請減稅以來客米廈門故有兩關一爲鎮閩將軍海關委協領監收雜費倍正稅一隸同知則譏察出入而已至是議減正稅之半其雜費一切罷之協領不可迭與爭乃上其事於省卒如議一月之間米商大至人恃無恐四年五月大軍收復漳州諸縣皆平廈乃解嚴總督左宗棠彙保歷年

文武官弁賜加道銜七月調充鄉試內監試官尋改內收掌官將行民以鼓吹鏡水周歷市廛數萬人送至金鷄嶺或哭失聲鄉試畢調補福州海防同知五年六月奉檄署漳州雲霄同知其官廨自兵燹後盛傳有鬼前官死於是者三人林居之竟無恙李福泰自粵藩撫閩旣入境士民之懇其長吏者踵至而雲霄獨無李微服周歷城鄉歎曰入閩以來第一好官也七月調充鄉試內監試官七年二月赴福防同知本任有土豪著翅虎者黨羽數百人爲暴于鄉里逮而笞之閉目若瞑蓋其人蓄有異藥服之刀杖不能傷命置密室夜漏將盡忽提而鞠之使倉卒不及服藥自知不免叩頭乞命卒繩諸法九年八月升授福甯府知府林於屬吏中廉能貪劣有小冊記其事甚詳歲終具密揭上之雖罷斥者亦心服焉郡校入學諸生冊費甚鉅第一名必百金以次遞減亦數十金寒士難之謁太守求緩頰林曰是固有之不可廢命各以一二金爲贄郡僻陋文風久不振擇書院中高才十人入署中讀書



月再課之逾年竟得拔貢者二中式者一所歷皆艱難辛苦性和易而廉介有守一羊裘三十年兩袖皆穿雖見客弗易當江浙震驚時故鄉親友來依賙之無吝色居官不苟取勢要不能以非禮干所至有聲所去常見思同治十二年卒

家傳見春在堂雜文三編

### 邵紅是傳

沈 鑣

邵桂字香輪紅是其別號也五歲卽能握管爲人書便面年十六補弟子員第一旋以高等食餼每試輒冠軍性疎達不事生產短褐敝履授徒於里既久困鄉闈人莫不爲之扼腕而處之淡如也與同里嚴圭木孫詒爲文字知己圭木官山左鄒平縣延課其子甫抵署卽問泰嶽遠近裹糧遊月餘始返圭木謂之曰君才十倍我而不獲一第命也雖然星家謂君命利於北我爲君援例試北闈可乎笑曰吾無食肉相性又懶富貴非所願也君盍以援例資贈我作一年醉於願足矣遂辭歸生平作文不屬草作詩亦隨手散逸常

曰文章本從太虛中結撰而成成後卽還之太虛而已嘉慶元年某月日以微疾卒年五十有三子春煦幼患手足痿痺不克嗣父業沈鑣曰有才者遇恆嗇乃又阨其後人亦酷矣

### 傅雲龍傳

程 森

傅雲龍初名雲艷字懋元別號醒夫鄉賢羹梅長子幼就塾讀書有疑義輒索解十二歲通經史及諸子百家言長又研究兵學清咸豐九年滇寇李永和率十萬衆圍潼川知府阮祐文達之子也知雲龍學留主其家爲畫守城策共二十五日圍遂解阮欲以奏獎笑謝之不受編修繆荃孫有詩曰功成不膺賞指此阮擢永甯道禽李賊敗林自清解叙永圍收復長甯皆與有力焉時母姚僑居開縣大亂雲龍聞之心膽俱碎欲馳省阮曰內憂外患交逼吾圉先生去誰與策者遣使迎母至見母泣母亦泣旣聞擊賊有功破顏爲笑曰鄉者人言汝如處子豈知汝者嗣奉母命入官京曹籤分兵部武選司

兼車駕司郎中時兵燹既戢郎署多暇出其餘緒著經翼十卷史徵八卷說文解字正名十五卷金石集成三百卷漢文五百卷唐文精粹十卷餘著述甚夥有旨傳考學問博碩者使海國雲龍著論二千餘言第一遂出使日本美利堅秘魯巴西及英屬地加納大日斯巴尼亞屬地古巴假道新加納大厄瓜多智利巴他峨尼先塔盧斯凡歷十一國皆著有圖志既旋呈所著書德宗側席慰勞褒曰書甚詳以道員分發直隸直督李鴻章檄會辦機器局事清慶王奕匡以雲龍兼充海軍衙門幫總辦以漢員膺此前未之聞也直督王文韶檄爲機器局總辦疏保使才爲諸臣冠裕祿代任直督撤總辦事乃去直村民數百人獻德政繳牌雲龍辭曰民雖見愛但我辦局事無與民事何繳牌爲蓋在局時凡遇便民之事無不爲民間有橋改爲堤種菽粟堵水害故甚感之值庚子蒙塵雲龍束裝擬馳赴行在以疾卒於滬覃恩給一品封典歸葬德清性孝友爲人正直不阿又勇於任事所至親王鉅公皆器

德清縣新志

卷七 人物

二十五

重之每陳時事輒數百千言當道爲改容配氏李有淑德三次剖股愈夫疾

另有子范初另有范翔范鉅女范淑另有傳

蔡匯滄傳

程森

蔡匯滄字二源邑諸生事母孝家貧游於粵見歐化東漸慨然曰十數年後不通其語言文字不足以有爲乃殫心研究以盡其能清同治丙寅以通判分發江蘇初署贛榆縣有惠政光緒癸巳上海推廣租界時匯滄爲英租界會審讞員奉檄辦事與洋人反復辨論乃劃至西華德路而止民有感泣者任事七年中外安之癸卯清北洋大臣袁世凱奏調隨辦商約一時倚重平居謂所親曰國勢如此交涉案件求勝萬難我惟持其平而已無他長也歷保至候補道指分直隸記名海關甲辰隨欽差鐵良查察東南各省事宜國計民生多所補救乙巳除山東登萊青膠兵備道監督東海關察吏治求民隱所屬幾治積勞成疾猶夙夜在公時距日俄戰事久海口有沈艦三艘當

道不顧問匯滄據中立理言於領事而起之東撫楊士驤飛章入告加二品銜常關征稅歷任皆以定額報而盈收之數甚鉅及病篤尙命其子伯華以實報外交著績居官稱廉丙午冬卒於任年六十六入祀上海縣名宦祠

蔡燮昌傳

吳 璆

蔡燮昌字耀甫生而岐嶷長而敦敏九歲居母喪哀毀如成人事繼母以孝聞嘗刲股以療其疾年弱冠一應童子試不第遂治刑法家言業成有聲於時轍迹所至凡郡一州縣十有九居停咸敬禮有加其治獄也持之審慎出以哀矜不尙慘覈之術故手訂爰書至千百起而從無枉縱管館上高某君幕適鄰邑有白蓮之警邑之某者豪於資善結客託之者謂與賊通某君欲窮治其事擬以兵夜半往捕燮昌以無佐證力阻之且逮數人則某者方夜宴客平日舍濫交佞佛外無劣迹遂薄斥遣之卒無他變論者謂是獄若稍涉張皇某者家立破株連者且數十人矣丙戌丁亥間奉飭嚴治會匪各牧

令爲邀功地遇疑似者輒榜掠鍛鍊以成其獄燮昌第請於府主嚴保甲清戶口遇游民卽驅遣之有欲深文周內者輒以去就爭故所至不濫逮一人內行修飭篤于親故戚友有中落者輒濟其困乏誨其子弟遇急難雖解衣推食弗吝也天懷澹定不慕榮利治事之暇獨處一室賦詩彈琴超然于塵埃之表殆列禦寇莊周所謂近於道者耶光緒三十三年卒於陝西省寓年六十有八子寶善位通顯

謝可明傳

俞 樾

謝老人名可明德清中初鳴人也德清有金鵝山相傳有金鵝集於此凡三鳴故山之南有上中下三村皆名初鳴云老人年二十四歲時傭於唐棲姚氏姚氏所居曰致和堂其額猶董文敏所書自前明時得秘方爲藥丸以施人至清而貲財不繼乃始取直二百年來以姚丸名國中老人初至執役於肆中久而姚氏察其人忠實可恃日益親信事無巨細悉以委焉時余親家

翁子謙司馬甫七歲老人日提抱之及子謙舉於鄉入都應禮部試老人筦家政益勤慎子謙生二子二女老人撫愛之如子謙少時咸豐同治間浙中大亂子謙已前卒子女皆幼凡家中器用財賄皆在老人手毫釐無所苟及亂平復啓肆賣藥老人之力爲多時子謙妻張宜人亦卒其次子晉卿輒從老人眠起每於燈下讀書雖夜漏且盡老人必坐守之或讀少懈始而怒繼而泣下後晉卿與兄魯卿先後入仁和學老人乃喜同治十二年晉卿病於嗑頗危老人不解衣而寢者卅月及病愈老人舉杯語晉卿曰爲阿官已戒飲十日矣蓋老人性簡默無他嗜好惟喜飲酒雖至數升不醉也晉卿生一子老人又提抱如前姚氏三世皆視老人如阿保云老人終身不娶故無子以兄子爲子光緒七年年七十有四矣晉卿言於余曰老人之在吾家歷四代無二心積五十年如一日求諸儕輩罕有倫匹今老人老矣不忍其泯沒願先生爲傳存集中庶後世知有老人而老人聞之亦可銜杯一笑也余曰

諾因爲之傳論曰余次子婦卽子謙司馬次女也故余常至姚氏見謝老人須髮蒼然而事姚氏之事仍如少壯時勸之休息不可余甚敬之嘗讀侯朝宗壯悔堂集有郭老僕傳馮山公解春集有俞老僕傳余之文固不足以及二子若老人者固其流亞哉

卷七勘誤表

頁	面	行	字	原	文	更	正	備	註
一	後	十二	十四	匿		匿			
五	後	二	五至六	蒙龜		龜蒙			
十四	後	四	十八至十九	扈方		方扈			

